

19. april 2016

UPA 2016/38

Inatsisartut suleriaasianni § 36 naapertorlugu matumuuna apeqquteqaat aallaavigalugu oqallinnissamik siunnersuut saqqummiuppara:

Qallunaat oqaasiinut taarsiullugit Tuluit oqaasiisa pingaarnertit aappaattut Nunatsinni meeqqat atuarfianni atuartitsissutigineqartalernissaat pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Vivian Motzfeldt, Siumut)

Tunngavilersuut:

Nunatsinni kalaallit oqaatsigut tassaapput pingaarnarpaat, qaqugorsuarmut ataqqillugit kinguaatsinut ingerlatittuagassagut.

Danmarkimik naalagaaffeqateqarnitta aqqani qallunaat oqaasii ukiuni arlalinngortuni oqaatsitta aappaattut atorpagut ilinniagaralugillu.

Tuluit oqaasii, nunarsuarmioqatitsinnut pingaarnarpaatut attaveqaataasut, oqaatsit pingajuattut ilinniagaraagut.

Danmarkilu naalagaaffeqatigiinnerput tunngavigalugu isumaqatigiissutillu malillugit ilinniartorpasuit qallunaat nunaannut ilinniariarlutik aallartarput, taamaattoq nunanut allanut ilinniartitaanikkut suleqateqarnerput qujanartumik suli annertusiartorpoq.

Nunarsuarmi sumiikkaluaraanniluunniit ilinniartitaanikkut ilisimatusarnikkut allarpassuartigullu tuluit oqaasii annertunerpaamik aallaaviullutik atorneqartarput, qallunaalli oqaasii piffinni ikittunguani kisimik atorneqarsinnaapput.

Atorfinititsinikkut nunanit allanit nunatsinnut tikisitat qallunaat nunaanneersuunerusarput aamma naalagaaffeqatigiinnerput tunngavigalugu. Ukiunili aggersuni nunanit allaneersut tuluttut oqaaseqartut tikisineqartarsinnaanerit ammaffiginerulertariaqarparput, qallunaat nunaat kisiat isumalluutigiunnaarlugu.

Oqartoqartarpoq ilinniarniaraanni qallunaat oqaasiinik piginnaasaqarnissaq pisariaqartoq, Atuarfitsialammi ilinniartinnilu allani atuakkat atuartitsissutit ilinniartitsissutillu amerlasuut qallunaatuujunerat tunngavigalugu aamma qallunaat nunaannut ilinniarniaraanni qallunaatut oqalussinnaanissaq paasisinnaanissarlu pisariaqartutut oqaaatigineqartarmat.

Nunarsuarmi atuakkat meeqqanut atuartitsissutit ilinniartunullu ilinniartitsissutit tuluttut allasimasut siuarsimanerpaajupput aamma qallunaat nunaanniluunniit ilinniarniaraanni ilisimatusarniaraanniluunniit tuluttut oqalussinnaanissaq paasisinnaanissarlu pingaaruteqarnerpaajuvoq ingammik ilisimatusarnikkut atuagarsornermi tuluit oqaasii annertunerpaamik atorneqartillugit. Aammalu allaat ullumikkut Danmarkimi ingerlaqqiffiusumik milinniarfiit ilaat tuluttuinnaq ingerlanneqar-

talereerput, taamaammat apeqqusertariaqalerparput, ilumut qallunaat oqaasii tuluit oqaasiinit pingaarnerusutut nunatsinni inissisimajuaannassanerpat?

Inuiaqatigiit kalaallit nalilersueqqittariaqalerpugut, nunarsuarmi sumiikkaluaruttaluunniit tuluit oqaasii paaseqatigiinnissamut aallaaviutillugit, ilumut qallunaat oqaasii piffinni annikitsunnguani kisimik atorneqarsinnaasut paasineqarsinnaasullu, nunatsinni oqaatsit aappaattut Meeqqat Atuarfianni atuartitsissutigiinnarniarnerlugit?

Meerartagut inuusuttortagullu siunissaraagut, taakkua nunarsuarmioqatitsinnut ammanerulernissaat ilisimasaqarnerulernissaallu aqutissiuuttariaqarparput, taamaammat tuluit oqaasiisa nunatsinni Meeqqat Atuarfianni pingaarnerit aappaattut atuartitsissutigineqartalernissaat atuutsinneqalissasoq siunnersuutigaara.

Apeqquteqaat aallaavigalugu oqallinnermit Inatsisartut oqaaseqaatissaattut siunnersuut imaattoq saqqummiuppara:

Inatsisartut Naalakkersuisunut kaammattuutigaat meeqqat atuarfiat pillugu iluarsartuusseqqinneq aallarteqqullugu, taamaaliornikkut tamakkiisumik atuarfitsialaap piviusunngortinnissaa anguneqarsinnaaqqullugu aammalu danskit oqaasiinut taarsiullugit tuluit oqaasiisa pingaarnerit aappaattut Nunatsinni meeqqat atuarfianni atuartitsissutigineqartalernissaat piviusunngortinniarlugu sulineq aallarteqqullugu.